



年譜
凌輯
上下

柳田文庫
文庫11
D 99
12



文庫 11
D 99
12

陽泉山莊

48-11885

010190549416



遺山先生金匱不仕幾三十年其舊都之感故君之思幽憂
慷慨之端悱惻纏綿之故不可明言者悉寓之於詩顧其詩
集分體而不編年其出處又皆散見於他書閱之者但獵取
其辭華剽襲其體格而已究未能得其寄託之所在也乾隆
辛丑客居揚州讀先生之詩而愛之展卷之際身世漠不相
關古今渺不相接然而其情之可以移人者常一往而不可
窮其誠之可以動物者每三復而不能置茫茫然而來怦怦
焉欲動不自知其何心也既而取金史先生本傳及文集排
比而類次之尋先生所遭之時與先生所處之境而後先生
之出處本末有所攷庶幾先生之詩之命意有所窺蓋其天
懷所感激偶於一物焉而伸之其孤憤所鬱結偶於一事焉
而發之身處於元而心在乎金言盡於此而意繫乎彼細而

陽泉山莊

序

陽泉山莊

元遺山先生年譜 卷一
按之隨處皆舊都之感故君之思也始知向之相賞於辭華體格間者爲已淺矣然先生出處本末天興甲午以前雖具金史本傳而自乙未以至丁巳往來乎齊魯燕趙晉魏之間行蹤靡定本傳及郝陵川所撰墓銘皆未之詳蒐緝亦殊不易易也於是放魯氏之於少陵施氏之於東坡之例以年爲經以詩緯之爲先生年譜一書癸卯在京師曾以草創質翁覃溪師師甚喜曰昔者亦擬爲此今得子書余可以不作矣子其勉旃嗣以牽於俗累稿凡數易終未成書及就官寧國稍稍得暇乃取舊稿并雜采金史元史中州集歸潛志元文類洎金元人文集撰著之等鈎稽校勘釐爲二卷以仕金時事爲上卷北渡後事爲下卷其可攷者錄之其不可攷者闕之後人議論之誣攷證之疏者則爲辨之至於其詩之寄託

之所在未敢臆解聊自附於季卿元之之後惜道遠不獲就正於吾師也嘉慶元年歲在丙辰十一月朔歛凌廷堪序

元遺山先生年譜卷上

歙凌廷堪次仲編

平定張穆頤洲校梓

金章宗明昌元年庚戌先生生

生七月出繼叔父格

先生南冠錄引予以始生之七月出繼叔氏隴城府君迨大安庚午府君卒官扶護還鄉里時予年二十有一矣

郝經先生墓銘先生諱好問字裕之太原秀容人系出拓跋魏故姓元氏曾大父春忠顯校尉隰州團練使大父滋善儒林郎銅山府君贈朝列大夫父格顯武將軍鳳翔府路第九處正將兼行隴城縣令騎都尉河南縣開國男邑食三百戶妣河南縣君張氏

穆案先生本生妣河南郡太君

陽泉山莊

王氏見為第四女配壻祭家廟文續夷堅志云外祖柔服簿王君大定中卒官又一條云鄜州洛郊有妖人白神官外祖王君時為此縣主簿

金史本傳元德明太原秀容人案舉不第放浪山水間有東巖集三卷子好問取知名

廷堪案先生以始生七月出繼叔氏中州集所謂先大夫字德明號東巖者先生本生父也郝經陵川集遺山先生墓銘所謂父格顯武將軍兼行隴城令者即叔氏隴城府君也故先生集中為第四女配壻祭家廟文稱德明為顯伯考贈中順大夫東巖府君稱格為顯考廣威隴城府君金史本傳據中州集謂德明為先生父但失載出繼一事耳至金詩紀事則云案中州集載楊叔玉墓銘云先生姓元氏字德明好

問不敢名父故云爾金史傳中不為詳著漫從中州集所載亦以字書失實甚矣山西舊志中每有金人元格詩始知德明名格也竟以格與德明合為一人較金史尤誤夫格為隴城令德明隱居繫舟山不仕出處判然何不攷之甚耶郭元釭全金詩亦以德明為即元格今悉正之

又案覃溪師曰集中自注云余家自五代以後自汝州遷平定宋末又自平定遷於忻故文字中以平定為鄉郡此云宋末謂靖康末也 又案嘉慶五年十一月翁覃溪師自都門寄示新刻所著元遺山先生年譜一卷於是取廷堪稿中所未備者補錄焉另標覃溪師曰以別之不敢昧所自也間有異同之處亦

不復追改懼失其真也穆案凌氏補錄諸條皆以小字寫於書肩余既并刻翁譜則補錄諸條可不復出故全刪之而存其首條以見例

二年辛亥二歲

三年壬子三歲

四年癸丑四歲

始讀書

先生南冠錄引予自四歲讀書八歲學作詩今四十年矣

五年甲寅五歲

從父格官掖縣

廷堪案先生濟南行記云子兒時從先隴城府君官掖縣嘗過濟南又濟南雜詩云兒時曾過濟南城暗

筭存心只自驚四十二年彈指過只疑行處是前生

先生再遊濟南在乙未七月則知格官掖縣時先生

方五歲也

六年乙卯六歲

承安元年丙辰七歲

能詩

郝經先生墓銘先生七歲能詩太原王湯臣稱為神童

二年丁巳八歲

學作詩

先生南冠錄引八歲學作詩

廷堪案墓銘作七歲能詩與此異南冠錄引為先生

自敘必不誤

三年戊午九歲

四年己未十歲

五年庚申十一歲

從父格官冀州

郝經先生墓銘年十一從其叔父官於冀州學士路宣叔賞其俊爽教之為文

泰和元年辛酉十二歲

二年壬戌十三歲

三年癸亥十四歲

從父格官陵川受業於郝天挺之門

穆案先生嘗與田紫芝同從曾大雨游

見續夷堅志

郝經先生墓銘年十有四其叔父為陵川令從先大父

學

金史隱逸傳郝天挺字晉卿澤州陵川人太原元好問嘗從學進士業貞祐中居河南耿耿自信寧困窮終不一至豪富之門年五十終於舞陽

元史郝經傳經字伯常其先潞州人徙澤之陵川祖天挺元裕嘗從之學金亾經往來燕趙間元裕每語之日子貌類汝祖才器非常勉之世祖元年以翰林侍讀學士使宋館真州伯顏南伐宋懼以禮送歸明年卒諡文忠

廷堪案元史所稱元裕即先生也初疑先生字裕之修史者採諸舊書成於倉卒誤脫之字故趙復等傳又有元好問竟若兩人後攷張德輝等傳元裕之稱

屢見豈先生北渡後或改名為裕歟未可盡以為史

誤也穆案四元玉錄莫若序稱鋒人元裕有細州羅士琳謂即先生是也至疑鋒人為絳人之訛則

誤然亦不能定其當作何字

又案元史又有一郝天挺字繼先出於朵魯別族受

業於遺山元好問累拜河南行省平章政事謚文定

嘗修雲南實錄五卷又注唐人鼓吹集十卷行於世

此天挺非晉卿也時先後有二郝天挺一為先生之

師一為先生之弟王文簡池北偶談辨之甚詳

四年甲子十五歲

學為時文

先生古意詩七歲入小學十五學時文

五年乙丑十六歲

本生父德明卒

先生中州集先人捐館後十年好問避兵南渡游道日

廣世始知有元東巖詩

廷堪案宣宗貞祐二年五月遷都南京是年為甲戌

先生避兵南渡河年二十有五則前十年先生十六

歲

六年丙寅十七歲

七年丁卯十八歲

父格始教之民政

先生南冠錄引十八先府君教之民政從仕十年出死

以為民

天慶觀記子嬰年先大父挈之四方十八乃一歸

八年戊辰十九歲

衛紹王大安元年己巳二十歲

長女真生

郝經先生墓銘女五人長曰真適進士東勝程思溫

廷堪案先生示程孫詩云生女四十年今有為父樂

又云明年吾六十家事斷關白則知真生先生方二

十也

又案先生子三人長撫次振次摠女五人生年可攷

者惟真及三女順長子撫而已

二年庚午二十一歲

父格卒官隴城先生扶護還秀容

先生南冠錄引大安庚午府君卒官扶護還鄉里時年

二十有一矣

續夷堅志好問年二十一先君官隴城大安庚午春先

人疽發于鬢好問愚幼平居作舉子計於醫藥懵然無

所知庸醫滿前任其施設先君竟用是捐館

三年辛未二十二歲

崇慶元年壬申二十三歲

廷堪案先生兩山行記予年二十許時自燕都試與

客登南樓者當在此一二年間

至寧元年癸酉二十四歲

廷堪案是年八月癸巳紇石烈執中弒衛王九月甲

辰宣宗即位壬子改元貞祐

宣宗貞祐二年甲戌二十五歲

蒙古兵陷忻州屠城先生兄好古遇害先生避兵南渡河
先生敏之兄墓銘兄字敏之諱好古歿於貞祐二年三
月北兵屠城之禍年二十九矣

又荅聰上人書僕自貞祐甲戌南渡河時犬馬之齒二
十有五

廷堪案元史太祖本紀八年癸酉是秋命皇子朮赤
察台窩闊台爲右軍循太行而南取保遂安肅安定
邢洛磁相衛輝懷孟掠澤潞遼沁平陽太原吉陽拔
汾石嵐忻代武等州而還癸酉爲至寧元年卽貞祐
元年與墓銘所稱貞祐二年三月者不同
又案是年五月宣宗遷都南京

三年乙亥二十六歲

廷堪案是年五月蒙古破中都先生西園詩哀中都
之破而作也

四年丙子二十七歲

忻州被兵奉母張夫人南渡河寓居福昌縣之三鄉鎮十
月蒙古破潼關避兵於女几

先生故物譜貞祐丙子之兵藏書壁間得存兵退奉先
夫人南渡河舉而付之太原親舊家自餘雜書及先人
手寫春秋三史莊子文選之等尙千餘冊并畫百軸載
二鹿車自隨三研則瘞之鄭村別墅是歲寓居三鄉其
十月北兵破潼關避於女几之三潭比下山則焚蕩
餘蓋無幾矣

廷堪案金史地理志南京路嵩州福昌縣有女几山

又有三鄉鎮卽先生避兵所居也

又案前荅聰上人書作甲戌南渡河此又云丙子南渡河二者恐有一誤

又案墓銘稱先生妣河南縣君張氏蓋隴城府君之配也

又案是年有女几山避兵送李長源歸關中詩又虞坂行自注丙子夏將南渡河道出虞坂感而有作再集中如涌金亭示同游諸君及嘯臺感遇諸詩皆當作於是年涌金亭詩中云我從汾晉來山之面目腹背皆經過濟源盤谷非不佳煙景獨覺蘇門多語氣亦是踰太行而南初入懷衛光景乾隆癸卯在京師大興翁覃溪師曾以此詩石刻見示中唯空青斷石

壁微茫散煙螺與集作散煙蘿者小異餘皆同書法迺美頗類虞永興是知先生亦善書也

興定元年丁丑二十八歲

在三鄉撰錦機一卷以詩文見禮部尙書趙秉文

先生錦機引興定丁丑間居河南始集前人議論爲一編以便觀覽

又趙閑閑眞贊興定初始以詩文見故禮部閑閑公公若以爲可教爲延譽諸公間又五年仍得以科第出門

郝經先生墓銘從先大父學先大父卽與倡和或者譏其不事舉業先大父言吾政不欲渠爲舉子爾區區一第不足道也遂令肆意經傳貫串百家六年而業成下

太行渡大河爲箕山琴臺等詩趙禮部見之以爲少陵
以來無此作也以書招之於是名震京師目爲元才子
廷堪案金史趙秉文傳秉文字周臣大定二十五年
進士拜禮部尙書卒年七十四閑閑其自號也著有
淦水集後爲先生座主又本集有三鄉時作七絕一
首又論詩絕句三十首自注云丁丑歲三鄉作皆是
年也

二年戊寅二十九歲

三年己卯三十歲

第三女阿秀生

先生孝女阿秀墓銘孝女阿秀奉直大夫尙書省令史
元好問第三女也興定己卯生於登封

廷堪案墓銘載先生女五人長曰真適進士東勝程
思溫次嚴女冠詔爲宮教號浯溪真隱次順早卒次
適陳和郎大都惠民司提點太原翟國才次適建德
路織染局大使定襄霍繼祖攷孝女阿秀年十三以
開興壬辰三月朔死與墓銘所謂次順早卒者合則
阿秀當名順郭氏全金詩云三女順集中有示女珍
詩珠圍翠繞三花樹李白桃紅一捻春看取元家第
三女他年眞作魏夫人順當作珍四女名柔則阿秀
又名珍矣元蔣正子山房隨筆稱先生有妹爲女冠
能詩先生之妹爲女冠無可攷或恐因次女嚴爲女
冠而致誤耳

又案阿秀墓銘作於天興元年所謂尙書省令史者

卽尙書省掾也與本傳合

四年庚辰三十一歲

在河南與李純甫雷淵李獻能同遊玉華谷

李純甫題古仙人辭後與定庚辰夏六月望予與元好問趙李獻能同遊玉華谷又將歷崧前諸剎因憩於少姨廟元周行廊廡得古仙人辭於壁間

廷堪案本集有同希顏欽叔玉華谷分韻得軍華二字詩二首又有同希顏欽叔玉華谷還會善寺卽事詩二首中州集雷御史淵有玉華山中同裕之分韻送欽叔得歸字詩李右司獻能有玉華谷同希顏裕之分韻得秋字詩攷金史雷淵傳淵字希顏一字季默應州渾源人登至寧元年詞賦甲科與定末拜監

察御史文藝傳李純甫字之純宏州襄陰人擢承安二年經義進士章宗南征兩上疏策勝負上奇之薦入翰林元兵起論時事不報正大末改京兆府判官卒於汴李獻能字欽叔河中人貞祐三年廷試第一人授應奉翰林文字出爲鄜州觀察判官復爲應奉俄遷脩撰正大末以鎮南軍節度副使充河中帥府經歷元兵破河中奔陝州行省以權左右司郎中值趙三三軍變遇害餘皆詳先生中州集及劉京叔歸潛志也

又案本集西園詩自注與定庚辰八月中作

又案金初之文皆遼宋故習大定明昌中趙周臣李之純楊之美始振興之至宣宗南渡雷希顏李欽叔

宋飛卿冀京父李長源王仲澤麻知幾辛敬之王飛伯諸人出始爲極盛故歸潛志云泰和大安以來科舉之文敝蓋有司惟守格法無育才心文風益衰及宣宗南渡貞祐初趙閑閑爲省試有司得李欽叔賦大愛之擢爲第一又擢麻知幾爲策論魁於是舉子輩譁然俄欽叔中宏詞科入翰林衆始厭服正大中欽叔復爲省試有司得史學優賦大愛之亦擢爲第一於是舉子輩復大譟俄學優對廷策中之議者亦息又云南渡後文風一變文多學奇古詩多學風雅由趙閑閑李屏山倡之故能一掃遼宋餘習而雷希顏宋飛卿諸人皆作古文趙閑閑晚年詩多法唐人李杜諸公已而麻知幾李長源元裕之輩鼎出故後

進作詩者爭以唐人爲法也先生自貞祐南渡河與諸鉅公遊所得師友之益日多故能鬱爲一代宗工蓋先生之生實間氣所鍾集金之大成開元之先聲以主持數百年文章氣運非偶然也集中有李屏山挽章二首趙閑閑眞贊四哀詩諸作益以見先生於師友之誼甚摯云屏山卽之純也四哀者李欽叔冀京父李長源王仲澤也欽叔卽獻能京父中州集云冀禹錫字京父龍山人崇慶二年進士正大中奏充知事官奴之變乃自投水中歸潛志云京父值蒲察官奴之變與宰相李蹊同見殺年四十三與中州集異長源金史文藝傳云李汾字長源平晉人爲人尙氣喜讀史工詩元光間舉進士不第去客唐鄧間恒

山公武仙署為行省講議官既而仙與參知政事完顏思烈相異同懼汾欲除之汾道沁陽仙追獲之絕食而死年未四十歸潛志云為仙麾下所殺與史異仲澤中州集云王渥字仲澤以字行興定二年進士正大七年朝廷與宋人議和擇可為行人者仲澤以才選凡再至揚州制司宋人愛其才有中州豪士之目八年權右司郎中中牟失利不知所終歸潛志云天興改元渥從赤盞合喜兵援武仙鄭州西遇北兵大戰歿於陣亦與中州集異

五年辛巳三十二歲

登進士第座主趙秉文

金史本傳中興定五年第

郝經先生墓銘登興定五年進士第不就選

廷堪案先生趙閑閑真贊云興定初始見閑閑公又五年仍得以科第出公之門又閑閑公墓銘云公之葬也孤子似以好問公門下士來速銘又有野菊座主閑閑公命作詩

元光元年壬午三十三歲

二年癸未三十四歲

往來箕穎與馮璧雷淵李冶劉從益李獻能麻九疇張穀辛愿李汾王鬱劉光謙白華史學諸人為友相倡和著述日富

先生真定府學教授常君墓銘元光癸未予過鄆城見麻徵君知幾

又葉縣中嶽廟記癸未之夏予過昆陽

郝經先生墓銘往來箕穎間數年而大放厥辭於是家按其什人嚼其句洋溢於里巷吟諷於道塗巍然坡谷復出也

廷堪案郝伯常所謂往來箕穎大放厥辭應在此時集中如箕山緱山置酒同希顏再登箕山光武臺穎亭留別濼亭穎谷封人廟贈荅劉御史雲卿度太白嶺往昆陽楚漢戰處同欽叔賦諸詩皆當作於此數年歸潛志云余先子翰林令葉時同坊州郝仲純賦昆陽懷古詩諸公多繼作先子有云營屯澠水橫陳處計墮劉郎小怯中天雷風埽妖氣人間虎豹畏真龍千秋一片昆溪月曾照堂堂蓋世雄郝云戰骨

至今埋澠水暮雲何處是春陵李長源云穎川南下鬱陂陲遐想當年戰壘多自是真人清宇宙誰為豎子試干戈元裕之云英風未覺消沈盡試向春陵望鬱蔥王飛伯云落日一川英氣在西風萬葉戰聲來後云誰倚城樓弔興廢一聲長笛暮雲開李欽叔白文舉史學優皆有詩余亦作一古詩也攷先生中岳廟記癸未過昆陽則作詩當在是年再攷志所稱先子翰林者即劉從益也從益為京叔之父字雲卿渾源人大安元年進士有蓬門集見金史文藝傳馮壁字叔獻真定人承安二年經義進士李冶字仁卿欒城人登金進士第元至元二年以學士召就職麻九疇字知幾易州人正大初特賜進士張穀字伯玉許

州人張轉運毅之弟辛愿字敬之福昌人不仕王鬱
字飛伯大興人劉光謙字達卿瀋州人秦和三年進
士白華字文舉澳洲人貞祐三年進士天興二年叛
降宋史學字學優河南人正大中進士以上並見金
史中州集歸潛志元史諸書

哀宗正大元年甲申三十五歲

五月試宏詞科程文爲章宗皇帝鐵券行引秦王擒竇建
德降王世充露布光武中興頌大司農箴

先生趙閑閑眞贊正大甲申諸公貢某詞科公爲監試
官以例不赴院宿一日坐禮曹欽叔從外至誦某秦王
成寶建德降王世充露布公頗爲聳動顧座客陳司諫
正叔言人言我黨元子誠黨之邪公之篤於自信如此

廷堪案本集章宗皇帝鐵券行引秦王擒竇建德降
王世充露布題下注云二篇正大元年五月應辭科
程文餘二篇光武中興頌大司農箴不及錄又擬
賀登寶位表擬立東宮詔擬除樞密使制擬御史大
夫讓樞密使 擬除司農卿制五篇題下注云正大
元年奉都堂鈞旨作蓋在試前也

又案野菊詩當作於是年歸潛志云正大初趙閑閑
長翰林苑同陳正叔潘仲明雷希顏元裕之諸人作
詩會嘗賦野菊趙有云岡斷秋光隔河明月影交荒
叢號蟋蟀病葉挂蠨蛸欲訪陶彭澤柴門何處敲諸
公稱其破的也今攷先生有野菊座主閑閑公命作
及野菊再奉座主閑閑公命作二詩皆七言律見集

中

二年乙酉三十六歲

在京師權國史院編脩夏還居嵩山作杜詩學

先生吏部掾屬題名記正大二年五月日儒林郎權國

史院編脩官元某記

又警巡院廨署記同

又杜詩學引乙酉之夏自京師還間居嵩山因錄先君

子所教與聞之師友之間者為一書名曰杜詩學

廷堪案歸潛志云元裕之李長源同鄉里各有詩名

由其不相下頗不相咸李好憤怒元嘗云長源有憤

擊經元好滑稽李輒以詩譏罵元亦無如之何元嘗

權國史院編脩官時末帝召故駙馬都尉僕散阿海

女子入宮俄以人言其罪又蒙放出元因賦金谷怨

樂府詩李見之作代金谷佳人荅一篇以拒焉一時

士人傳以為笑談元詩云娃兒十八嬌可憐亭亭裊

裊春風前天上仙人玉為骨人間畫工畫不出小小

油壁車軋軋出東華繡帶盤絞結雲裾踏雁沙嬌雲

一片不成雨被風吹去落誰家豈無年少恩澤侯錦

鞵貂帽亦風流不然典取鸚鵡裘四壁相如堪白頭

金谷樓臺杳無主燕子不飛花著雨只知環佩作離

聲誰解琵琶得私語有情蜂雄蛺蝶雌無情雞欺翡

翠兒勸君滿飲金屈卮明日無花空折枝李詩云石

家園林洛水濱粉垣碧瓦迷天津樓臺參差映金谷

歌舞日日嬌青春是時天下甲兵息江南已傳歸命

臣永平以來太康治四海一家無窮人洛陽城中厭
醜醜司隸夜過不敢噴王門威里事豪侈車馬如水
爭紅塵燒金斫玉延上客季倫豈輸趙王倫兩家炎
炎貴相軋笙竽嘈嘈妓成列珊瑚紅樹鞭擊碎步障
青絲馬踏裂因緣睚眦貴人怒詔下黃門促收捕郵
夫防吏急喧驅河南牒繫御史府鐘鳴漏盡行不休
生存華屋歸山邱綠珠香魂沈塵土侍兒忍居樓上
頭君王慈明宥率土妾身竄居籍民伍平生作得健
兒婦狗走雞飛豈敢惡元和其詩先子稱工攷先生
以乙酉權國史院編脩官次年除鎮平令則是詩作
於乙酉可知志所稱末帝蓋哀宗也再攷金史李長
源元光間舉進士不中用薦爲史館書寫時趙秉文

爲學士雷淵李獻能皆在院長源不之下秉筆諸人
積不平而雷李尤切齒當在此時而先生獨不以爲
忤長源被害爲詩以哀之復編其詩於中州集始終
懇懇亦可見其友誼之篤矣長源此詩中州集全金
詩皆不載先生詩亦與集多異又先生和詩日後芳
華怨見集中

又案本集有乙酉六月十一日雨詩

三年丙戌三十七歲

除鎮平令

郝經先生墓銘初筮仕除鎮平令

廷堪案郝伯常稱先生初除鎮平令再轉內鄉攷先
生乙酉歲居嵩山丁亥已轉內鄉令則官鎮平時應

在丙戌

又案本集有從鄧州相公覓酒時在鎮平及鎮平寄姪孫伯安筆鎮平書事自鎮平暫住秋林道中寄家諸詩

四年丁亥三十八歲

轉內鄉令

先生長慶新泉記鄧之西百里而遠是為內鄉之東鄙有山焉其麓二泉灌田千畝有奇今以其地名之長慶泉正大丁亥子承乏是邑

五年戊子三十九歲

在內鄉營長壽新居

先生行齋賦序戊子冬十月長壽新居成仲經張君從

子十鄰

延堪案中州集張參議澄字之純別字仲經本出遼東烏惹族國初遷之隆安

又案本集有戊子正月晦日內鄉西城遊眺詩又觀浙江漲詩自注時拜大赦五日矣攷金史哀宗紀正大五年六月壬戌以旱赦雜犯死罪以下則詩當作於此時又攷金史地理志南京路鄧州武勝軍內鄉縣有浙水水經注浙水出析縣西北宏農盧氏大蒿山則浙水即析水也漢書地理志析縣屬宏農郡後漢書郡國志屬南陽郡皆作析隋書地理志浙陽郡始作浙即今浙川縣也皆以浙水得名本集誤浙為浙時浙江屬南宋先生何由而至乎

又案先生時作令內鄉淅水在縣境故往觀之顧俠君以爲鄖陽者亦非

又案本集記夢詩天上材官老不材從教兀兀走塵埃夢中望拜通明殿曾見金書兩字來自注戊子七月二十四日內鄉往盧氏宿走馬平夜夢拜天帝像遂觀法駕導引畫幄最前負弩三人中有金書小字題裕之者夢中不自知其爲子也則知先生是年又嘗至盧氏

六年己丑四十歲

子阿千生作東坡詩雅丁母張夫人憂居內鄉白鹿原構新齋於菊水」讀書其間

先生子阿千始生詩四十舉兒子提孩聊自誇

又東坡詩雅引作東坡詩雅目錄一篇正大己丑河南元某書於內鄉劉鄧州光父之東齋

又新齋賦序子旣罷內鄉出居縣東南白鹿原結茅菊水之上聚書而讀之

郝經先生墓銘再轉內鄉遂丁艱憂

廷堪案墓銘載先生子男三人長曰撫奉直大夫汝州知州兼管諸軍奧魯勸農事次曰振太原路參伍次曰撻尙書都省監印釋詩意則阿千當屬先生長子撫也

又案墓銘終喪辟南陽令攷先生官南陽歲在辛卯則居喪應在己庚間

又案中州集劉鄧州祖謙字光甫安邑人承安五年

進士正大初除武勝軍節度副使

七年庚寅四十一歲

居喪劉祖謙辟爲從事不就

先生竹林禪院記正大庚寅予間居空空廣因進士康國仲寧以記請因爲記其事四月望日前內鄉令元某記

廷堪案集中有謝鄧州帥免從事之辟詩云憂端擾擾力難任世事駸駸日見臨三載素冠容有愧一時墨經果何心首邱自擬終殘喘陟屺誰當辦苦音遙望朱門涕橫落相公恩德九原深先生蓋不忍爲奪情之舉也

八年辛卯四十二歲

終喪辟南陽令配張氏病歿內遷尙書都省掾

郝經先生墓銘終喪正大中辟中州南陽令南陽大縣兵民十餘萬帥府令兼鎮撫甚有威惠

又配同郡張氏戶部尙書林卿之女再配臨清毛氏權貨司提舉飛卿之女

先生孝女阿秀墓銘年十三予爲南陽令其母張病歿孝女日夜哭泣明年得病於汴梁

廷堪案本集宛邱歎自注髯李令南陽後十年予爲此縣辛卯七月農司檄予按秦陽陂田又有京居辛卯八月六日作詩攷郝伯常墓銘於正大中辟南陽令後卽云詔爲尙書都省掾居無何除左司都事再轉爲中順大夫行尙書省左司員外郎兼脩起居注

上騎都尉河南縣開國子食邑五百戶賜金紫魚袋
天興初入翰林知制誥金亾不仕入翰林知制誥繫
之於天興初則其餘皆當在是年也京居詩蓋內遷
時作又先生良佐碑云爲東曹掾吏部主事在天興
元年金史哀宗紀先生由尙書省掾爲左右司員外
郎在天興二年再攷金史百官志尙書省左司員外
郎一員正六品都事二員正七品右司同先生爲左
司都事亦在天興二年見完顏奴申傳皆與墓銘互
異今據本集及金史編輯而附記墓銘於此以備攷
又案金史哀宗紀正大八年四月大元兵平鳳翔府
則集中岐陽詩三首當作於是年也

天興元年壬辰四十三歲

在京師官東曹掾吏部主事冬哀宗將東狩先生言於時
相請以小字書國史一本隨駕未及行是年三月女阿秀
死

金史本傳天興初擢尙書省掾

先生鎮南軍節度使良佐碑天興元年六月故禦侮中
郎將陳和尚死節事聞詔擇文臣相與往來者爲褒忠
廟碑宰相以東曹掾吏部主事臣某應詔
又趙閑閑眞贊壬辰冬某以東曹掾知雜權都司取行
止卷觀之見公獨銜及楊雷猥相薦引者十七章
又南冠錄引京城之圍予爲東曹都事知舟師將有東
狩之役言於諸相請以小字書國史一本隨車駕所在
以一馬負之時相雖以爲然而不及行也

又阿秀墓銘以開興壬辰三月朔死

廷堪案本傳云天興初擢尚書省掾頃之除左司都事與墓銘異亦與辛卯京居詩不合先生文中所謂東曹卽左司也蓋先生由南陽令擢尚書省掾當在去年辛卯而遷左司都事則在是年也

又案是年正月改元開興四月始改元天興十二月哀宗出奔河北蒙古速不臺圍南京本集有壬辰十二月車駕東狩後卽事詩五首

二年癸巳四十四歲

蒙古速不臺圍京城甚急時先生爲左司都事白留守完顏奴申及副樞完顏習捏阿不欲立二王監國效春秋紀季入齊之義以全兩宮及皇族二王荆王曹王也議未決

明日西面元帥崔立反殺奴申阿不以太后令立衛王子從恪爲梁王監國以先生爲左右司員外郎立自稱鄭王遂送款蒙古脅百官父老立碑頌功德劫太學生劉祁撰文磨甘露碑刻之四月先生至青城五月北渡

金史完顏奴申傳天興二年正月戊辰省令史許安國詣講議所言古者有大疑謀及卿士謀及庶人今事勢如此可集百官及僧道庶問計左司都事元好問以安國之言白奴申奴申曰此論甚佳可與副樞議之副樞亦以爲然好問曰自車駕出京今二十日許又遣使迎兩宮民間洶洶皆謂國家欲棄京城相公何以處之阿不曰吾二人惟有一死耳好問曰死不難誠能安社稷救生靈死而可也如其不然徒欲一身飽五十紅衲

車亦謂之死耶阿不款語曰今日惟吾二人何言不可
好問乃日聞中外人言欲立二王監國以全兩宮與皇
族耳阿不即命召京城官民明日皆聚省中諭以事勢
危急當如之何有父老七人陳詞二相命好問受其詞
白之奴申顧曰亦爲此事也或曰是時外圍不解如在
陷甯議者欲推立荆王以城出降是亦春秋紀季入齊
之義況北兵中已有曹王也奴申拱立無語獨阿不反
覆申諭且繼以涕泣明日戊辰崔立與其黨爲變
又哀宗紀天興二年正月戊辰安平都尉京城西面元
帥崔立舉兵爲亂殺參知政事完顏奴申樞密副使完
顏斜捨阿不勒兵入見太后立衛王子從恪爲梁王監
國自稱左丞相都元帥尙書令鄭王弟倚平章政事侃

殿前都檢點其黨李朮魯長河御史中丞韓鐸副元帥
兼知開封府折希顏藥安國張軍奴完顏合荅並元帥
師肅左右司郎中賈良兵部郎中兼右司都事又署工
部尙書溫迪罕二十吏部侍郎劉仲周並爲參知政事
宣徽使奧屯舜卿爲尙書左丞戶部侍郎張正倫爲尙
書右丞左右司都事張節爲左右司郎中尙書省掾元
好問爲左右司員外郎都轉運知事王天祺懷州同知
康瑋並爲左右司都事遂送款大元軍前癸酉元將碎
不斛進兵汴京四月癸巳以梁王從恪荆王守純及諸
宗室男女五百餘人至青城皆及於難甲午兩宮北遷
又崔立傳二相遇害立還省中議所立立曰衛紹王太
子承恪其妹公主在北兵中可立之乃召承恪以太后

元遺山先生全集卷之四
誥命梁王監國百官拜舞山呼承恪受之凡除拜皆以
監國爲辭

又王若虛傳天興元年哀宗走歸德明年春崔立變羣
小附和請爲立建功德碑翟奕以尙書省命召若虛爲
文時奕輩恃勢作威人或少忤則讒搆立見屠滅若虛
自分必死私謂左右司員外郎元好問曰今召我作碑
不從則死作之則名節埽地不若死之爲愈雖然我姑
以理論之乃謂奕輩曰丞相功德碑當指何事爲言奕
輩怒曰丞相以京城降活生靈百萬非功德乎曰學士
代王言功德牌之代王言可乎且丞相旣以城降則
朝官皆出其門自古豈有門下人爲主帥誦功德而可
信乎後世哉奕輩不能奪乃召太學生劉祁麻革輩赴

省好問張信之喻以立碑事曰衆議屬二君且已白鄭
王矣二君其無讓祁等固辭而別數日促迫不已祁卽
爲草定以付好問好問意未愜乃自爲之旣成以示若
虛乃其刪定數字然止直敘其事而已後兵入城不果
立也

先生內翰王公墓表崔立劫殺宰相送款行營羣小獻
諂請爲立建功德碑以都堂命召公爲文喋血之際翟
奕輩恃勢作威公自分必死奕輩不能奪竟脇太學生
託以京城父老意而爲之公之執義不回者蓋如此
劉祁歸潛志錄崔立碑事崔立旣變以南京降自負其
有救一城生靈功謂左司員外郎元裕之曰汝等何時
立一石書吾反狀耶時立國柄入手生殺在一言省庭

日流血上下震悚諸在位者畏之於是乎有立碑頌功德議數日忽一省卒詣予家齋尙書禮房小帖子云首領官召赴禮房子初愕然自以布衣不預事不知何謂卽往至省門外遇麻信之予因語之信之曰昨日見左司郎中張信之言鄭王碑事欲屬我輩作豈其然耶卽同入省禮房省掾曹益甫引見首領官張信之元裕之二人曰今鄭王以一身救百萬生靈其功德誠可嘉今在京官吏父老欲爲立碑紀其事衆議屬之二君且已白鄭王矣二君其無讓予卽辭曰祁輩布衣無職此非所當爲況有翰林諸公如王丈從之及裕之輩在祁等不敢裕之曰此事出於衆心且吾曹生自王得之爲之何辭君等無讓予卽曰吾當見王丈論之裕之曰王論

亦如此矣予卽趨出至學士院見王丈時修撰張子忠應奉張元美亦在焉予因語其事且曰此事諸公職某輩何與焉王曰此事議久矣蓋以院中人爲之若尙書檄學士院作非出於在京官吏父老心若自布衣中爲之乃衆欲也且予未仕在布衣今士民屬予子爲之亦不傷於義也余於是陰悟諸公自以仕金顯達欲避其名以嫁諸布衣又念平生爲文今而遇此患難以是知揚子雲劇秦美新其亦出於不得已耶因遂讓而別連延數日又被督促知不能辭卽畧爲草定付裕之一二日後一省卒來召云諸宰執召君余不得已赴省途中遇元裕之騎馬索予因劫以行且拉麻信之俱往初不言碑事止云省中召王學士諸公會飲余亦陰揣其然

既入卽引詣左參政幕中見參政劉公謙甫舉盃屬吾二人曰大王碑事衆議煩公等公等成之甚善余與信之俱遜讓曰不敢已而謙甫出見王丈在焉相與酬酢酒數行日將入矣余二人告歸裕之曰省門已鎖今夕既飲當留宿省中余輩無加之何已而燭至飲余裕之倡曰鄭王碑文今夕可畢手也余曰有諸公在諸公爲之王丈謂余曰此事鄭王已知衆人請太學中名士作子如堅拒使王知諸生輩不冝作是不許其以城降也則銜之刻骨縉紳俱受禍矣是子以一人累衆也且子有老祖母老母在堂今一觸其鋒禍及親族何以爲智子熟思之余惟以非職辭久之且曰余旣爲草定不當諸公意請改命他人諸公不許促迫甚余知其事無可

奈何則曰吾素不知館閣體今夕諸公共議之如諸公避其名但書某名在諸公後於是裕之引紙落筆草其事王丈又曰此文姑使裕之作以爲君作又何妨且君集中不載亦可也余曰裕之作政宜某復何言碑文旣成以示王丈及余信之欲相商評王丈爲定數字其銘詞則王丈裕之信之及存余舊數言其碑序全裕之筆也然其文止實敘事亦無褒稱立言時夜幾四鼓裕之趣曹益甫書之裕之卽於燭前焚其藁遲明余輩趨去後數日立坐朝堂諸宰執首領官共獻其文以爲壽遂召余信之等俱詣立第受官余輩深懼見立俄而諸首領官齎告身三通以出付余輩曰特賜進士出身因爲余輩賀後聞求巨石不得省門左舊有宋徽宗時甘露

碑有司取而磨之工書人張君庸者求書刻方畢北兵入城縱剽余輩狼狽而出不知其竟能立否也嗟乎諸公本畏立禍不敢不成其言已而又欲避其名以賣布衣之士余輩不幸有虛名一旦爲人之所劫欲以死拒之則發諸公嫁名之機諸公必怒怒而達崔立禍不可測則吾二親何以自存吾之死所謂自經於溝瀆而莫之知且輕殺吾身以憂吾親爲大不孝矣況身未祿仕權義之輕重親莫重焉故余姑隱忍保身爲二親計且其文皆衆筆非余全文彼欲嫁名於余余安得而辭也今天下士議往往知裕之所爲且有曹通甫詩楊叔能詞在亦不待余辯也因書其首尾之詳以誌少年之過空山靜思可以一笑

廷堪案崔立功德碑事爲先生生平一大疑案今反覆詳攷知其爲劉京叔所撰無疑也他不具論歸潛志乃京叔所自著之書載撰文始末甚詳其語皆游移無定蓋有愧於中而不覺其詞之遁也試卽其所記而論之其曰以是知揚子雲劇秦美新出於不得已是以揚雄自解其撰文之慚也其曰欲以死拒則吾二親何以自存是以二親自釋其撰文之罪也其曰知不能辭卽畧爲草定則已自承不諱矣乃云其文皆衆筆其誰信之其曰齋告身三通付余輩則已受賞不辭矣乃云諸公欲嫁名又誰信之旣以碑序誣先生矣而曰銘辭存余舊數言則天良蓋不容盡泯焉旣以起草屬先生矣而曰書某名在諸公後則

真情或有時一露焉其曰並無褒稱崔立之言夫諛詞非出己手何煩代爲未減乎況陵川集有林希極口吠堯之語爲明徵也其曰王丈爲定數字夫惡名已有所歸何事過爲株連乎況金史有王若虛以死自誓之文爲左驗也良由當時迫於威勢事後物論不容欲辭其名難昧其實聊爲此以分己之謗耳易傳曰誣善之人其辭游失其守者其辭屈其京叔之謂歟金詩紀事未見歸潛志足本乃謂先生受謗不爲無因亦昧於知人論世矣辨詳下卷己亥年

又案完顏奴申傳天興元年正月戊辰集官民間計又曰明日戊辰崔立與其黨爲變哀宗紀亦云正月戊辰崔立爲亂則奴申傳兩戊辰必有一誤又奴申

傳先生已爲左司都事而哀宗紀乃云以尙書省元好問爲左右司員外郎亦小異至墓銘所謂天興初入翰林知制誥者未審在何時也

又案本集併體雪香亭雜詠十五首當作於是年攷金史地理志南京純和殿正寢也純和西曰雪香亭亭北則后妃位也此禁掖嚴密之地是年四月癸巳崔立送二王及諸宗室於蒙古甲午兩宮北遷故先生入覽故宮而興感也今詳詩中有云爲向杏園雙燕道營巢何處過明年是時金源妃主始遷青城曰過明年者借雙燕而傷身世之飄零也又云若爲常得熙春在時上高層望宋州是時哀宗車駕尙在歸德曰望宋州者借登樓而念君臣之瑣尾也又云批

奏內人輪上直去年名姓在窗間言故君去冬始東狩也又云重來未必春風在更爲梨花住少時言此身今夏將北渡也雖未明紀歲月而行間紙上歷歷可尋况哀宗於是年五月始走蔡州今詩尙云望宋州宋州者歸德也則在五月以前可知又詩中如海棠流鶯暮春等語景物亦在三月四月之交皆可爲作於癸巳年未北渡之證楊升庵藝林伐山以爲詠宋徽宗時事誤不待言金詩紀事辨之曰遺山集中雪香亭雜詠乃金亾之後重過汴宮而作黍離之感觸目興懷白髮纍臣自傷故國非爲隔代詠也其說當矣然不知卽作於癸巳年未北渡之時而漫云重過汴宮是於先生詩亦未之深攷也又王文簡詠先生詩蘭成賸有江南賦落日青山望蔡州誤宋州爲蔡州蓋以金亾於蔡州故云然不知作是詩時哀宗尙未至蔡州也又純和殿詩中作醇和與金史異又案金史悉本楊渙然汴故宮記仁安殿之次曰純和殿西曰雪香亭故本集題下注云亭在故汴宮仁安殿之西也

又案本集癸巳四月二十九日出京詩云塞外初捐宴賜金此言蒙古初起也當時南牧已駸駸此言中都繼陷也只知灞上眞兒戲此言武仙鄭州之潰也誰謂神州遂種沈此言崔立汴京之降也華表鶴來應有語此言徙百官也銅槃人去亦何心此言遷重器也興亾誰識天公意留著青城閱古今此哀二王

之被害兩宮之播越也又有癸巳五月三日北渡詩
三首又南冠行自注登已秋爲曹得一作又癸巳除
夜詩云更殘鐘未動猶屬出京年則先生北渡在天
興癸巳明甚堯山堂外紀庶齋老學叢談諸書以爲
在壬辰者皆誤

三年甲午四十五歲

羈管聊城作南冠錄

先生清真觀記歲甲午余自大梁羈管聊城
又南冠錄引歲甲午羈管聊城益之兄邈在襄漢遂有
彼疆此界之限姪傳侔繫之平陽存亾未可知伯男子
叔儀姪孫伯安皆尙幼未可告語余年已四十有五殘
息淹淹朝夕待盡使一日顛仆於道路則世豈復知有

河南元氏哉乃手寫千秋錄一篇付女嚴以備遺忘

又學東坡移居詩我作南冠錄一語不敢私稗官雜家
流國風賤婦詩成書有作者起本良在茲

廷堪案是年正月戊申哀宗在蔡州傳位於東面元
帥承麟是爲末帝己酉蔡州破哀宗自縊於幽蘭軒
末帝被害金亾

又案本集學東坡移居詩八首當作於是年詩中有
云壬辰困重圍金粟論升勾明年出青城瞑目就束
縛毫釐脫鬼手攘臂留空橐聊城千里外狼狽何所
託此其證也又云去年住佛屋盡室寄尋丈今年僦
民居卧榻礙盆盎攷密公寶章小集詩自注甲午三
月二十有一日爲輔之書於聊城至覺寺之寓居卽

所謂住佛屋者蓋在未移居之前也

又案本集甲午除夕詩暗中人事忽推遷坐守寒灰
望復然已恨大官餘麴餅空教漢水入膠船神功聖
德三千 大定明昌五十年甲子兩周今日盡空將
衰淚灑吳天此詩首句哀金社之已墟次句冀金源
之復振三句感汴京之被圍四句痛義宗之不返五
句言禮樂之明備而懼國史之淪亾也六句言章廟
之澂平而思興陵之德澤也七句則紀金代享國之
數也八句則傷曩臣去國之情也一篇之中故君故
國之思纏綿悱惻先生真完顏氏忠臣也

又案集中有得姪傳信二首及懷益之兄詩攷南冠
錄引歲甲午羈管聊城益之兄邈在襄漢又云姪傳

俘繫之平陽存亾未知此三詩或當作於是年也又
姪傳一本作姪搏先生承奉河南元公墓銘云公諱
升字德清兄隴城府君則先生叔父也又云無子以
從孫好謙之子搏奉其後亦作搏字與先生子撫振
摠偏旁俱同則作傳字者蓋誤

又案淮右詩及續小娘歌皆作於是年淮右詩云淮
右城池幾處存宋州新事不堪論輔車謾欲通吳會
突騎誰當擣薊門細水浮花歸別澗斷雲含雨入孤
村空餘韓偓傷時語留與曩臣一斷魂續小娘歌云
黃河千里扼兵衝虞虢分明在眼中爲向淮西諸將
道不須誇說蔡州功並譏宋人渝盟助蒙古以蹙金
而自失輔車唇齒之計也

元遺山先生年譜卷下

欽凌廷堪次仲編

平定張穆願洲校梓

蒙古太宗七年乙未四十六歲

與李天翼杜仁傑遊濟南

先生濟南行記予兒時嘗過濟南然但能憶其大城府而已乙未秋七月始以故人李君輔之之故而得一至焉

廷堪案自是而後先生在蒙古故以蒙古紀年時蒙古

古尚未有年號是年亦為宋理宗端平二年也

又案本集有半山亭招仲梁飲詩泛舟大明湖詩自

注待杜子不至濟南行記亦云泛大明待杜子不至

杜子即仲梁也又有送李輔之官青州詩攷中州集

李警院天翼字輔之固安人貞祐二年進士汴梁既下辟濟南漕司從事全金詩杜仁傑字仲梁一字善夫濟南長清人元時繁微不起與先生善先生嘗稱其詩似李長源麻知幾也

又案集中乙未正月九日立春詩云重碧總誇燕市酒小紅誰記上林花又濟南雜詩云別有洞天君不見鵲山寒食泰和年是亦旄邱之誕節宗周之行邁也

八年丙申四十七歲

客冠氏令趙天錫所三月偕天錫往泰安會行臺嚴實因游泰山旋返冠氏六月馮內翰璧見過九月作東坡樂府集選

先生東游紀畧丙申三月二十有一日冠氏趙侯將會行臺於泰安侯以予宿尚遊觀拉之偕行凡三十日往復千里

又贈馮內翰詩序內翰馮丈往在京師日渾源雷淵希顏太原王渥仲澤河中李獻能欽叔龍山冀禹錫京父皆從之問學某亦得俎豆於門下士之末然自辛卯壬辰以來不三四年而五人者唯不肖在耳丙申夏六月公自東平將展墓於鎮陽以某在冠氏枉駕見過又東坡樂府集選引丙申九月朔書於陽平寓居之東齋

廷堪案元史趙天錫傳天錫字受之冠氏人辛巳春歸行臺嚴實以功授冠氏令戊戌征宋還卒於冠氏

又嚴實傳實字武叔泰安長清人庚辰七月來歸木
華黎承制拜實金紫光祿大夫行尙書省事辛巳攻
東平入居之甲午授東平路行軍萬戶庚子卒年五
十九中統二年追封魯國公諡武惠是時當金亾之
後嚴實能養士故金之故老中州之名士多往歸之
而天錫爲冠氏令亦嘗延致名儒攷論今古先生自
癸巳北渡至戊戌還鄉客冠氏者凡數年皆依天錫
以居者也

又案歸潛志馮內翰璧字叔獻致仕歸嵩山結茅玉
峯下自號松庵徜徉泉石間釀酒名松醪味勝京師
採蘭置室中與山僧野客作鬪蘭會壬辰之亂北歸
由東平至鎮陽以歿年七十有九又先生內翰馮公

神道碑銘尙憶公還鎮陽過好問冠氏語及舊事往
往色揚而神躍正指是年事叔獻眞定人故云還鎮
陽所謂由東平者蓋自嚴實處來也

又案冠氏縣爲漢館陶縣地宋書州郡志魏分東郡
及魏郡爲陽平郡治館陶縣故先生每稱冠氏爲陽
平也

九年丁酉四十八歲

客冠氏冬往東平

先生興福禪院功德記丁酉之秋見淨文於山陽蓋自
河南歷大名東平訪予而及之

又遽然子墓碣銘丁酉冬復來東州

廷堪案是年亦爲宋理宗嘉熙元年

又案先生是年嘗至懷孟元史地理志懷慶路元初
為懷州太宗四年行懷孟州事丁酉秋見淨文於山
陽當在懷孟時攷漢書地理志河內郡山陽縣太行
山在西北又金史地理志興定四年以修武縣重泉
村為山陽縣隸輝州蓋因漢舊縣而置元省故城在
今懷慶府修武縣魏村漢獻帝為山陽公居濁鹿城
者即此故先生別覃懷幕府諸君詩云太行醴秀在
山陽又過濁鹿城與趙尙賓談山陽舊事詩云因君
憶得曹瞞事銅雀臺荒又幾年是先生所稱山陽皆
指懷州漢志又有山陽郡治昌邑縣故城在今濟寧
州金鄉縣非此山陽也
十年戊戌四十九歲

自東平返冠氏秋始挈家由懷孟歸秀容

先生范鍊師真贊戊戌之夏予過東平留宿正一宮

又千戶趙侯神道碑銘侯諱天錫世為冠氏人予往客
陽平者六年歲戊戌以叔父之命將就養於太原侯留
連鄭重數月不能別軍行河平予與之偕分道新鄉置
酒行營中夜參半把燭相視不覺流涕之覆面也明日
使人留語云欲與吾子別而情所不忍唯有毋相忘而
已於是疾馳而去不返顧嗚呼此意其可忘哉

廷堪案先生自癸巳五月北渡至是凡六年始克歸
里故集中有戊戌秋八月初二日別冠氏諸人詩又
有戊戌八月二十二日入濟源寓舍詩戊戌十月山
陽雨夜詩皆自冠氏還鄉道中作也攷別冠氏諸人

詩云分手共傷千里別低眉常愧六年貧他時細數
平原客看到還鄉第幾人云六年貧與趙侯神道碑
客陽平六年者合蓋自癸巳統計也云平原者卽指
天錫蓋先生得歸天錫之力爲多故詩及之又初挈
家還讀書山雜詩四首亦作於是年其詩云并州一
別三千里滄海橫流二十年先生自貞祐四年丙子
避兵南渡河至此凡二十三年云二十年者舉大數
也

又案讀書山卽繫舟山先生本生父東巖公讀書處
也趙閑閑滏水集題東巖道人讀書堂詩序云裕之
先大夫讀書於此東巖其自號也山頭佛屋五三間
山勢相連石嶺關名字不妨從我改更稱元子讀書

山先生詩云天門筆勢到閑閑相國文章玉筍班從
此晉陽方志上繫舟山是讀書山自注繫舟山先大
夫讀書之所閑閑公改爲元子讀書山
又案別冠氏諸人詩諸本皆戊戌顧俠君元詩選作
戊辰者誤

十一年己亥五十歲

先生以金之實錄在順天萬戶張柔家乃言於柔願爲撰
述柔奏上方闕館爲樂夔所阻乃構野史亭於家著述其
上當是時澤源劉祁因撰崔立功德碑爲清議所持乃力
以碑文誣先生及王若虛與之共撰以分其過樂夔楊宏
道曹居一輩皆附和其說先生弗之辨也唯於秋夜詩及
外家別業上梁文二篇微示其意而已後陵川郝經作辨

磨甘露碑詩始爲之力白其誣

金史本傳晚年尤以著作自任以金源氏有天下典章法度幾及漢唐國史作已所當任時金國實錄在順天張萬戶家乃言於張願爲撰述旣而爲樂夔所阻而止好問曰不可令一代之蹟泯而不傳乃構亭於家著述其上因名曰野史凡金源君臣遺言往行采摭所聞有所得輒以寸紙細字爲記錄至百餘萬言今所傳者有中州集及壬辰雜編若干卷纂修金史多本其所著云

又完顏奴申傳贊劉京叔歸潛志與元裕之壬辰雜編二書雖微有異同而金末喪亂之事猶有足徵者焉郝經先生墓銘國史實錄在順天道萬戶張公府乃言

於張公使之間奏願爲撰述奏可方闕館爲武安樂夔所阻而止

先生秋夜詩九死餘生氣息存蕭條門巷似荒邨春雷謾說驚坏戶皎日何曾入覆盆濟水有情添別淚吳雲無夢寄歸魂百年世事兼身事樽酒何人與細論

又外家別業上梁文遺山道人蟬蠹書癡雞蟲祿薄猥以勃窣槃跚之跡仕於危急存亡之秋左曹之斗食未遷東道之戈船已御久矣公私之俱罄困於春夏之長圍窮甚析骸死唯束手人望荆兄之通好義均紀季之附庸出涕而女於吳莫追於旣往下車而封之杞有覲於方來謀則僉同議當孰抗爰自上書宰相所謂試微軀於萬仞不測之淵至於喋血京師亦常保百族於羣

盜垂涎之口皇天后土實聞存趙之謀枯木死灰無復
吳秦之淚初一軍搆亂羣小歸功劫太學之名流文鄭
人之逆節命由威制佞豈願爲就磨甘露御書之碑細
刻錦溪書叟之筆蜀家降款具存李昊之世修趙王禪
文何預陸機之手迹伊誰受賞於我嫁名悼同聲之間
有無罪無辜之誦耿孤懷之自信聽衆口之合攻果吮
癰舐痔之自甘雖竄海投山其何恨惟彼證龜而作鼈
始於養虺以成蛇追韓之騎甫還射羿之弓隨穀以流
言之自止知神理之可憑復齒平民僅延殘喘
又外家別業上梁文自注予北渡之初獻書中令君請
以一寺觀所費養天下名士造謗者二三亦書中枚舉
之類也

郝經辨磨甘露碑詩國賊反城自爲功萬段不足仍推
崇勒文頌德召學士滹南先生付一死林希更不顧名
節兄爲起草弟親刻省前便磨甘露碑書丹卽用宰相
血百年涵養一塗地父老來看閭流涕數罇黃封幾斛
米賣却家聲都不計盜據中國責金源吠堯極口無覩
顏作詩爲告曹聽翁且莫獨罪元遺山

廷堪案本集己亥元日詩五十未全老衰容新又新
漸稀頭上髮別換鏡中人野史纔張本山堂未買鄰
不成騎瘦馬還更入紅塵故以構野史亭繫之此年
又集中有己亥十一月十三日雪晴夜半讀書山東
龕看月詩又倪莊中秋詩自注己亥

又案元史張柔傳柔字德剛易州定興人金中都留

守戊寅降太祖還其舊職乙酉授行軍千戶保州等處都元帥崔立以汴州降柔於金帛一無所取獨入史館取金寶錄并秘府圖書訪求耆德衛送北歸太宗賜金虎符升軍民萬戶辛丑升保州爲順天府中統二年以金寶錄獻諸朝致仕又地理志保定路金順天軍元太宗十一年升順天路置總管府至元十二年改保定路攷是年己亥卽太宗十一年與柔傳辛丑升保州爲順天府者差二年

又案金史紀事云秋夜詩爲汴京之難言之也金史文藝傳云天興二年崔立之變羣小附和請爲立建功德碑翟奕召翰林學士王若虛爲文若虛自分必死以理論之奕輩不能奪乃召太學生劉祁麻革輩

赴省元好問張信之喻以立碑事祁等因辭而別數日迫促不已祁卽爲草定以付好問好問意未愜乃自爲之旣成以示若虛乃其刪定數字則當時碑文皆以爲裕之所作其不免於物議可知詩中悲銜坯戶冤抱覆盆傷九死之餘生慨百年之身世曹聽耳食實繁有徒樽酒細論所以嘆息于告語之無人也攷所引金史出王若虛傳文前皆本先生內翰王公墓表後數語卽本歸潛志此作史者不能決擇牽連采入何可引以爲據且郝陵川詩所謂曹聽翁者卽先生上耶律中令書中燕人曹居一歸潛志中曹通甫也鮮于樞困學齋雜錄曹居一字通甫一字聽翁通甫爲及甫之弟見先生集中所云造謫二三當卽

其一今乃云曹聽耳食實繁有徒竟以曹聽二字作曹好曹惡解認爲泛指時人其疏若此宜乎論先生此事不能得其要領也

又案金詩紀事云外家別業上梁文中云左曹之斗食未遷時裕之尙官左司都事其後梁王監國始遷左右司員外郎也東道之戈船已御時天興元年春元兵已駐鄭州海灘寺進攻汴京也圍城數月外援莫至奴申乞和訛可出質請罷攻而不得議親捍而大奔車駕蒙塵輿情無主衆欲推立荆王守純以城降元如春秋紀季入齊之義所謂人望荆兄之通好義均紀季之附庸也其時裕之實請於奴申與阿不欲立監國以全兩宮與皇族翼日而乃有崔立之變

二相被殺故有上書宰相喋血京師存趙有謀哭秦無淚之歎也至云劫太學之名流文鄭人之逆節似乎當時碑文仍出劉京叔手苟如史所云好問意未愜乃自爲之則安得復云蜀家降款具存李昊之世修趙王禪文何預陸機之手迹耶此論頗爲得之特所見歸潛志僅前八卷未覩足本故不能斷定耳其實碑文爲劉京叔筆詳見歸潛志第十三卷已錄於上卷天興二年癸巳并附辨於其後蓋文中伊誰受賞卽歸潛志告身三通特賜進士出身及陵川詩數罇黃封幾斛米之事也於我嫁名卽歸潛志裕之落筆草其事金史好問意未愜乃自爲之之說也夫當時立碑撰文不過畏崔立之禍非必取文辭之工有

京叔屬草已足塞立之請何取更爲之耶比而觀之
論者亦可以了然矣又天興二年正月哀宗戰於衛
州敗績夜登舟東幸歸德故曰東道之戈船已御今
謂指元兵駐鄭州亦誤鄭州在汴西非東也

又案金詩紀事云外家別業上梁文注中所云中令
君蓋耶律楚材也楚材爲文獻公履之第三子仕元
爲中書令裕之獻書卽在癸巳歲之四月於金爲天
興二年於元爲太宗之五年時汴京變後南中大夫
士歸河朔者所在有之故裕之寓書楚材請以一寺
觀費養天下名士也書中所枚舉者自耆舊如馮內
翰叔獻梁都運斗南高戶部唐卿王延州從之外時
輩爲平陽王狀元綱東明王狀元鶚濱人王賁臨淄

人李浩秦人張徽楊煥然李庭訓河中李獻卿武安
樂夔固安李天翼沛縣劉汝翼齊人謝良弼鄭人呂
大鵬山西魏璠澤人李恆簡李禹翼燕人張聖俞太
原張緯李謙冀致君張耀卿高鳴孟津李蔚眞定李
冶相人胡德珪易州敬鉉雲中李微中山陽果東平
李彥西華徐世隆濟陽張輔之燕人曹居一王鑄渾
源劉祁及其弟郁李全平定賈庭揚楊恕濟南杜仁
傑洛水張仲經虞卿麻革東明商挺漁陽趙著平陽
趙維道汝南楊鴻河中張肅河朔勾龍瀛東勝程思
溫及其從弟思忠共四十九人內劉麻二人之名皆
在焉然則所云造謗二三得毋卽指之耶但裕之與
信之素厚內鄉隱居河汾投老始終未嘗有閒京叔

父子兄弟其始亦極爲裕之所推許卽晚歲輯中州集時論雲卿蓬門先生集中詩尙云二子祁郁俱有名於時未聞有所譏貶如文中養虺成蛇穀弓射羿何甚也然猶稱之曰名流不深斥其人也諉之曰劫明其非得已也復爲之解曰命由威制則又似乎京叔之撰文翟奕張信之輩實使裕之促之者更爲之解曰佞豈願爲又似乎京叔屬草旣定之後裕之亦嘗畧爲刪改者後乃盡舉其過歸之一人是以悼同聲同氣之間有無罪無辜之謗也攷先生修史爲樂夔所阻劉京叔又引曹通甫詩爲先生撰碑之證此三人皆書中所收舉者非卽造謗二三之明驗乎若以與京叔兄弟始終無間及中州集中論次劉雲卿

詩無所譏貶爲疑則所見尤淺夫先生著作關乎國史豈肯以一己之恩怨紊千古之是非且集中尙有贈荅樂文舜咨及送曹及甫兼及通甫詩而楊叔能亦歸潛志中引其所作之詞爲證者先生則并爲序其所著小亨集是先生於數人皆無所介意不獨京叔兄弟也蓋先生所以不死者爲國史之故非爲富貴聲譽國史不亾其志已遂遑恤悠悠之口哉然其存心忠厚亦於此可見至于文中命由威制佞豈願爲二句在劫太學之名流文鄭人之逆節句之下乃原諒京叔之辭與歸潛志爲二親計劇秦美新等語正同文義甚明顯而以爲先生自解其促京叔及刪改京叔之文之語何其慎也益不足深辨已

又案金史紀事云遺山集內翰王公墓表云天興初冬十二月車駕東狩明年春正月京城西面元帥崔立劫殺宰相送款行營羣小獻諂請爲立建功德碑以都堂命召公爲文喋血之際翟奕輩恃勢作威頤指如意人或少忤則橫遭讒搆立見屠滅公自分必死私謂好問言今召我作碑不從則死作之則名節埽地貽笑將來不若死之爲愈也雖然我姑以理論之乃謂奕輩言丞相功德碑當指何事爲言奕輩怒曰丞相以京城降城中人百萬皆有生路非功德乎公又言學士代王言功德碑謂之代王言可乎且丞相旣以城降則朝官皆出丞相之門自古豈有門下人爲主帥頌功德而爲後人所信者問荅之次辭情

閒暇奕輩不能奪竟脅太學生託以京城父老意而爲之則碑文之出於劉京叔手可知伯常詩中勒文頌德召學士滹南先生付一死謂王從之能顧名節也林希更不顧名節兄爲起草弟親刻豈於時京叔撰文其弟文季亦在圍城中便爲之上石耶書丹卽用宰相血傷奴申阿不之見殺也父老來看閭流涕明非京城父老意也數罇黃封幾斛米卽遺山上梁文中所云受賞也賣卻家聲都不計當以二劉之高祖南山翁攜從曾祖西巖老人汲父御史從益於金源氏百年以來世爲高門今乃以此墮其家聲爲可惜也但林希二字殊不可解或以麻字之減文爲林信之自號貽溪復以貽溪之反語爲希耶信之爲秉

彝之孫亦有家聲但與詩所云兄弟者不合或卽爲
信之語以起草讓京叔而以刻石自任耶末云作詩
爲告曹聽翁且莫獨罪元遺山則所以爲裕之訟冤
者雖切然亦未嘗謂不與其事者蓋裕之自尙書省
掾遷左右司員外郎實爲崔立所署其受謫亦未爲
無因也攷伯常詩中林希更不顧名節句係用宋林
希名節埽地語事見宋史林希傳以喻京叔並無深
文乃穿鑿附會以麻信之當之誤矣又謂先生左右
司員外郎爲崔立所署受謫不爲無因則尤誤金史
稱凡除拜皆以監國爲辭安得謂崔立所署必若所
云則陶潛之建威參軍不得爲晉處士管寧之太中
大夫不得爲漢逸民也且伯常此詩原爲白先生之

冤而作故首冠以辨字幾於大聲疾呼今乃曲爲之
解謂有微辭則不獨誣先生並誣伯常矣烏可哉再
伯常詩兄爲起草弟親刻句亦與歸潛志異志云工
書人張君庸

又案本集雜著詩九首中云六國孱王走下風神人
鞭血海波紅無端一片云亭石殺盡蒼生有底功亦
借秦事而譏崔立碑也

十二年庚子五十一歲

家居秀容四月嚴實卒往東平

廷堪案本集有庚子三月十日作五言律詩一首又
杏花七言律詩二首自注云庚子歲南庵賦蓋皆家
居作也

十三年辛丑五十二歲

客東平行臺嚴忠濟所

先生故帥閻侯墓表辛丑元日子方客東平載之盛為具召余及大興張聖與祁人宋文卿東光勺龍英孺鎮人劉子新太原崔君卿渾源劉文季壽春田仲德輩飲于家之養素齋

廷堪案是年十一月太宗殂於和林行殿亦為宋理宗淳祐元年

又案先生東平行臺嚴公神道碑云以庚子四月己亥薨於私第之正寢又云五月壬申葬於鵲里之新塋又云既葬之三月孤子忠濟等以神道碑為請則先生往東平當在去歲庚子嚴實薨後故閻侯墓表

云辛丑元日子方客東平也又元史嚴忠濟傳忠濟

一名忠翰字紫芝實第二子辛丑太宗命佩虎符襲

東平路行軍萬戶中統二年召還京師命忠範代之

幕僚如宋子貞劉肅李昶徐世隆俱為名臣是後先

生往來東平皆主嚴忠濟家

又案載之即閻侯也名珍上黨人張聖與郭氏全金

詩云見續夷堅志晉里無攷今據此則聖與當為大

興人又雲巖詩序稱聖與三世相家以文章名海內

蓋遼金之世族也

壬寅年五十三歲

家居秀容

廷堪案是年春太宗昭慈皇后稱制攝國者五年元

史本紀不紀年但書千支今從之

又案本集晨起詩題下自注壬寅正月九日詩云

火青熒語夜闌柴荆寂寞掩春寒歡悰已向杯中減
老態何堪鏡裏看多病所需唯藥物一錢不直是儒
冠掣鯨莫倚平生手只有東溪把釣竿自注時欲經
營神山別業是知先生是年蓋家居也

癸卯年五十四歲

客燕京冬還秀容復往燕京

先生朝列大夫同知河間府事張公墓表歲癸卯秋九

月某客燕中

又通立大師李君墓碑癸卯冬予自燕都還太原道出

范陽

又曹徵君墓表壬辰之兵君流寓宏州癸卯冬予自新
興將之燕中乃枉道過之

又太古堂銘癸卯冬過慶源

續夷堅志癸卯初有熊數十萬從內鄉峽石入西南山
州縣有移文傳報予於彰德見之

廷堪案先生北渡後是年始往燕京元史地理志大
都路元太祖十年克燕初爲燕京路太宗紀八年夏
六月耶律楚材請立編修所於燕京經籍所於平陽
編集經史召儒士梁至充長官以王萬慶趙著副之
編修所者史也先生燕中之行蓋爲史事又集中有
贈荅趙仁甫詩元史儒學傳趙復字仁甫德安人太
宗伐宋挂俘籍姚樞脫之以歸復至燕學子從者百

餘人元好問文名擅一時其歸也復贈之言以博溺心末喪本爲戒攷先生至燕在是年則贈復詩亦當作於是年詩云江國辭客多玉骨無泥塵軒昂見野鶴過眼無雞羣又云老來詩筆不復神因君兩詩發興新都門回首一大笑袖中知有江南春其稱之不過如此則知復所言者先生亦未必以爲然也

又案元史地理志涿州范陽縣倚郭又大同路宏州唐爲清塞軍遼置宏州金仍舊領襄陰順聖二縣皆先生自燕往返及枉道所經者又元史地理志趙州宋爲慶源軍自秀容往燕不經其地意先生是年或偶留眞定歟又元史地理志忻州唐初置新興郡後改忻州秀容縣倚郭至元二年省入忻州故先生稱

秀容爲新興非後漢建安所置之新興郡也

又案本集有癸卯歲杏花詩云讀書山前二月尾向陽杏花全未開又病中詩自注癸卯四月二十一日晨起書蓋皆家居作又有癸卯宿中霍道院詩又水簾記異詩自注癸卯九月四日同杜仲梁賦洪谷聖鑑詩自注九月五日作攷水簾諸勝皆在黃華山然則先生是年秋亦嘗至彰德矣

甲辰年五十五歲

夏五月至崞縣偕定襄李之和廣寧王純甫游鳳皇山及前山秋往河南

先生兩山行記甲辰夏五月八日子以事當至崞縣約定襄李之和偕往明日入縣李別去子獨游神清觀行

臺員外廣寧王純甫棄官學道聞子來欣然出迎純甫先隱前高子問前高比雁門鳳皇山爲何如純甫言到則知之已而之和至卽日並山而東夜宿鳳山之麓又明日爲前高之游

又廣威將軍郭公墓表甲辰冬子過洛西

廷堪案本集有甲辰秋洛陽得黃葵子種之南庵明年夏六月作花詩又過寂通庵別陳丈詩自注甲辰秋又甲辰秋留別丹陽詩蓋先生於是年秋往河南又甲辰三月旦日以後雜詩三首及甲辰夏五月積雨十餘日不止遺悶二首則家居與往崞縣作也又案元史地理志冀寧路崞州本崞縣元太宗十四年升崞州

乙巳年五十六歲

自河南扶母張夫人櫬歸秀容秋往崞縣冬復往東平營葬事

先生與樞判白兄書自乙巳歲往河南舉先夫人旅殯首尾閱十月之久幾落賊手者屢矣狼狽北來復以葬事往東平連三年不寧居

又王無競題名記乙巳秋子與梁辨疑李輔之武伯佐游崞山

又雲巖詩序觀州倅武伯英崞縣人少日舉進士有詩名其賦翦燭刀有啼殘瘦玉蘭心吐蹴落春紅燕尾香之句甚爲時輩所稱家故饒財第宅園亭爲河東之冠貯書有萬卷樓嘉花珍果悉自他州移植爲人多伎巧

山水雜畫斲琴和墨皆極其工嘗得宣和湖石一窾窳穿漏殆若神劖鬼鑿炷香其下則煙氣四起散布槃水上濃澹霏拂有煙江疊嶂之韻伯英恃寶石以擅奇汾晉間與定末伯英歿於關中楊戶部叔玉購石得之壬辰圍城中以示予且命作詩危急存亡之際不暇及也乙巳冬十一月來東平過聖與張君之新軒而此石在焉聖與名之曰雲巖予問石所從來聖與言夏津王帥得之汴梁泥塗中以見貽

廷堪案本集有乙巳九月二十八日作詩

又案張夫人歿在正大六年己丑至是年乙巳凡十七年所云旅殯蓋在內鄉也

定宗元年丙午五十七歲

自東平歸過彰德

先生朝散大夫同知東平府事胡公神道碑歲丙午某過彰德

廷堪案本集有丙午九日詠菊詩二首亦家居秀容時作也

二年丁未五十八歲

家居秀容

先生藏雲先生袁君墓表丁未春芮城李邦彥過吾州又朝元觀記丁未春二月梁鍊師辨疑過新興踵門為予言

廷堪案本集有丁未寒食歸自三泉詩

三年戊申五十九歲

廷堪案是年三月定宗殂欽淑皇后聽政者六月議
所立三歲未決元史不紀年但書干支今從之

己酉年六十歲

客真定總府經歷張德輝所中州集成龍山趙國寶爲錄
木張德輝爲作後序九月往燕京

先生令旨重修真定廟學記王以丁未之五月召真定
總府參佐張德輝北上王從容問及鎮府廟學廢興德
輝奉命而南以己酉春二月庀徒葺事八月落成釋菜
教官李謙暨諸生合辭屬好問爲記以謹歲月
又信武曹君阡表己酉秋九月予以事來燕都

張德輝中州集後序遺山北渡後網羅遺逸首以纂集
爲事歷二十寒暑僅成卷帙己酉秋得真定提舉龍山

趙國寶資藉之始錄木以傳

廷堪案元史張德輝傳德輝字輝卿冀寧交城人金
亾北渡史天澤開府真定辟爲經歷官世祖在潛邸
訪中國人材德輝舉魏璠元裕李冶等二十餘人壬
子德輝與元裕北覲請世祖爲儒教大宗師世祖悅
而受之因啟桑朝有旨蠲儒戶兵賦乞令有司遵行
從之仍命德輝提調真定學校德輝天資剛直博學
有經濟與元裕李冶游封龍山時人號爲龍山三老
攷先生北渡後往來真定者凡數年其卒也亦在真
定蓋皆客德輝所真定廟學記所謂王者卽世祖在
潛邸時也

又案本集楊叔能小亭集序亦作於是年八月叔能

名宏道淄川人金亾仕元謚文節卽歸潛志引其詞以證崔立碑者金史元史皆無傳今小亨集始從永樂大典錄出故王文簡居易錄不能詳其生平本末也

又案金史本傳云有中州集壬辰雜編若干卷纂修金史多本其所著又歐陽元圭齋集送振先宗文歸祖庭詩小序云近年奉詔修三史於翰林故府中攜金人遺書得元遺山裕之手寫壬辰雜編一帙然則金史之成多本於先生二書可知中州集成於是年壬辰雜編已佚不知成於何時竊謂先生以史自任故天興顛沛之際猶請以小字書國史一本隨駕蓋綜金源一代而論收國之平遼天輔之滅宋征伐之

功不可泯也天眷之守成正隆之好大治亂之迹不可泯也大定之深仁厚澤比於堯舜明昌之典章制度幾及漢唐尤先生所惓惓不忘者也至於貞祐遷汴以來學士大夫風雅相向山林韋布文章自雄矧夫戈船東狩旃車北渡國君徇社稷烈士死封疆疾風勁草觸處生悲皆先生目覩而身罹者國可亾史不可亾身可死史不可死所以奔走間關終身不受升斗之祿不過欲以此身存百年之掌故而已向使奉詔闕館之日羣小不阻則網羅散佚搜采舊聞其所成之書當必明備詳覈鬱爲大觀豈歐陽元輩所可及哉然金源一代文獻卒賴野史亭紀載之力令後人猶有可攷雖謂先生纂述之功與完顏彝之死

三
二
殺張天綱之不屈爭烈可也再攷先生構野史亭在
己亥歲至是年僅十一年北渡在癸巳歲至是年亦
僅十七年張德輝後序言歷二十寒暑蓋約計之也
又案本集有己酉四月十七日度石嶺詩石嶺關在
忻州卽元至正間察罕與孛羅分據以爲界者也

庚戌年六十一歲

往順天路萬戶張柔家觀金實錄

先生順天府營建記庚戌秋七月子過順天

廷堪案本集與樞判白兄書云惟有實錄一件只消
親去順天府一遭破三數月功披節每朝終始及大
政事大善惡係廢與存亾者爲一書大安及正大事
則畧補之此書成雖溘死道邊無恨矣更看向去時

事稍得放鬆否也則知先生是年順天之行爲觀金
之實錄也

又案齊履謙知太史院事郭公行狀公諱守敬字若
思順德邢臺人先是順德城北有石橋以通達活泉
水兵後橋爲泥潦淤沒失其所在公甫冠爲之審覲
地形按指其處而得之河東元公裕之文其事於石
其曰里人郭生者卽公是也又先生邢州新石橋記
兩安撫張君耘夫劉君才卿思欲爲經久計乃命里
人郭生立集計工攷郭守敬卒於元仁宗延祐三年
丙辰年八十六則其甫冠當在是年庚戌先生年六
十一守敬水利律數及儀象制度之學皆前世所未
有論者推爲一代異人而少時蒙先生一語之稱道

作行狀者且據之以為榮則先生在當時聲望固何如也

憲宗元年辛亥六十二歲

家居秀容秋往真定

先生真定府學教授常君墓銘歲辛亥九月晦自太原東來過仲明之門

廷堪案仲明即常君也名用晦醇縣人又本集有辛亥寒食詩蓋家居秀容作

又案續夷堅志辛亥秋予與毛正卿德義仲昆郝伯常劉敬之諸人游順天寶教院則是年先生亦至順天也

一年壬子六十三歲

在真定與張德輝北見元世祖於潛邸返真定後冬往東平

元史張德輝傳壬子德輝與元裕北覲請世祖為儒教大宗師世祖悅而受之

先生東平行臺嚴公祠堂碑銘壬子孟冬公之嗣子某走書幣及好問於鎮陽

又東平賈氏千秋錄後記壬子冬十月自真定來東原又贈蕭漢傑詩序蕭漢傑大興人金初嘗賜姓奧里氏故時人又謂之奧里漢傑從軍二十年積官從三品燕城圍解之後間關南渡鐵嶺之潰復入陝州陝州亂羣不逞繫漢傑獄中漢傑破械而出為失侯故將者又二十年壬子冬與子相植于東原問其世知其為故人大

鈞之同母弟也

廷堪案先生以金源遺老而往見元世祖於潛邸者亦許魯齋不如是則道不行之義也夫明夷陳範振鷺來雍古人固已有之魯齋未仕金故拜爵而不復辭先生已仕金故往見而不受祿出處之道易地則皆然也

又案蕭漢傑賜姓奧里氏郭氏全金詩云案金國語解無奧里姓氏諸人事物類亦無此稱攷金史奚王回離保傳贊曰奚有五大定間類族著姓有遙里氏伯德氏奧里氏梅知氏揣氏是金有奧里氏矣但國語解未載耳

又案本集遊承天鎮懸泉詩自注閑閑公守平定以

大安庚午來遊迄今壬子四十三年矣攷先生自秀容東來常經過平定每稱平定爲鄉郡金史地理志平定州有承天鎮卽此詩云十月東來犯冰雪豈是年十月又至平定歟顧亭林日知錄云金元好問承天鎮懸泉詩注曰平定土俗傳介子推被焚其妹介山氏恥兄要君積薪自焚號曰妒女祠其碑大麻中判官李謹撰辭旨殊謬至有百日積薪一日燒之之語鄉社至今以百五日積薪而焚之謂之祭妒女其詩有曰神祠水之澣儀衛盛官府頗怪祠前碑稽攷失莽鹵吾聞允格臺駘宣汾洮障大澤自是生有自來歸有所假而自經溝瀆便可尸祝之祀典紛紛何所取子胥鼓浪怒未洩精衛銜薪心獨苦楚臣百問

天不酬旨以誕幻虛荒驚聾瞽自有宇宙有此水此水絲絲流萬古人言主者介山氏且道未有介山之

前復誰主山深地古自是有神物不假靈真誰敢侮稗官小說出閭巷社鼓村簫走翁姥當時大庾十才子爭遣李諶鑿陋語此是千古正論亭林通儒嘗薄文人為不足為今乃推崇先生之詩如此蓋亭林所薄者弁陋剽襲之文人而非有根柢之文人也再攷此詩無錫華氏本失載

又案本集有壬子寒食詩又寒食詩自注壬子清明後作皆似在家居時送高雄飛序在真定作為是年秋七月又壬子月夕詩云遙憐小兒女把酒望東州又壬子冬至新軒張兄聖與求為兒子阿平制名詩

三年癸丑六十四歲

聖與家在東平則皆東平時作也

在東平夏以事至燕京冬復往東平

先生致樂堂記癸丑之夏予以事來故都

又王黃華墓碑癸丑夏六月某客燕中

又宣武將軍孫君墓銘癸丑之冬予以行臺之召東來

廷堪案是年亦為宋理宗寶祐元年

又案本集送崔夢臣北上詩序云癸丑二月望日新

興元某序詩作於二月先生當在東平又題張彥寶

陵川西溪圖自注癸丑十一月三日題則先生亦在東平也

四年甲寅六十五歲

正月歸秀容秋游龍泉冬往東平十二月復由真定歸秀容

先生新軒樂府引甲寅十月望日河東元某題

廷堪案本集有甲寅正月二十三日故關道中詩又

臺山雜詠詩自注甲寅六月則知先生正月卽歸秀

容也又甲寅九月同臨漳提領王明之鹿泉令張奉

先賈千戶令春李進之冀衡甫遊龍泉寺詩獲鹿爲

隋鹿泉縣則知先生九月在獲鹿游龍泉也新軒爲

張聖與所居聖與家東平則知先生十月在東平也

又甲寅十二月出鎮陽寄宰魯伯詩則知先生十二

月自東平由真定而歸也又集中有鹿泉新居二十

四韻詩云寧州假館又兩年未保東來不西去然則

先生是年後又嘗僑居獲鹿也

又案先生自癸巳北渡後戊戌始歸秀容中間或在

冠氏或在東平或在河南或在燕京或在順天或在

真定或在秀容行蹤無常最難攷定非若癸巳以前

有本傳及墓銘可憑蓋卽徐世隆所謂周流乎齊魯

燕趙晉魏之間幾三十年者是也其在冠氏者主趙

天錫家在東平者主嚴實及忠濟家在河南者爲扶

欄事在燕京者爲國史事在順天者主張柔家在真

定者主張德輝家在秀容者則家居也及其卒也乃

在獲鹿則鹿泉新居或亦依德輝者歟

五年乙卯六十四歲

往東平冬復返真定

先生濮州刺史畢侯神道碑銘乙卯秋八月子來自鎮陽東平參佐王君璋以畢侯之子來

廷堪案本集有乙卯二月二十一日歸自汴梁二十
五日夜久旱而雨偶記內鄉一詩追錄於此今三十
年矣據此則是年先生當至汴梁又有乙卯十一月
往鎮州詩蓋自東平返真定也又有乙卯端四日感

懷詩

又案元史閻復傳弱冠入東平學時嚴實領東平行
臺招諸生肄進士業迎元好問校試其文預選者四
人復爲首攷復卒於皇慶元年壬子年七十七則冠
時當在是年乙卯時嚴實已前卒十三年迎先生往
東平校士者當屬嚴忠濟云嚴實者元史誤也

六年丙辰六十七歲

在獲鹿

先生故廉訪使楊公神道碑丙辰冬十月予間居西山
鹿泉

廷堪案本集有丙辰九月二十六日挈家游龍泉詩
云明年此日知何處莫惜題詩記姓名先生竟以次
年九月四日卒蓋詩讖也

七年丁巳六十八歲

七月將西歸不果遂於九月四日卒於真定獲鹿寓舍歸
葬於秀容陵川郝經銘其墓

先生尙藥吳辨夫壽家記丁巳秋七月子將西歸尙藥
吳辨夫有詩

金史本傳所著文章詩若干卷杜詩學一卷東坡詩雅三卷錦機一卷詩文自警十卷今所傳者有中州集及壬辰雜編若干卷年六十八卒

郝經先生墓銘歲丁巳秋九月四日遺山先生卒於獲鹿寓舍經走常山三百里蒸文酌酒哭於畫像之前

又某年月日葬於秀容之先塋

又當德陵之末獨以詩鳴上薄風雅中規李杜粹然出於正直配蘇黃氏天才清贍邃婉高古沈鬱太和力出意外巧縛而不見斧鑿新麗而絕去浮靡造微而神采燦發雜弄金碧揉飾丹素奇芬異秀洞蕩心魄看花把酒歌謠跌宕幽并之氣高視一世五言以雅爲正出奇於長句雜言至千五百餘篇爲古樂府不用古題特

出新意以寫怨思者百有餘篇用今題爲樂府揄揚新聲者又數十百篇皆近古所未見者也汴梁亾故老皆盡先生遂爲一代宗匠以文章獨步幾三十年銘天下功德者盡趨其門有例有法有宗有趣又至百餘首爲杜詩學東坡詩雅錦機詩文自警等集指授學者方吾道壞爛文曜瞠昧先生獨能振而鼓之揭光於天俾學者歸仰識詩文之正而傳其命脈繫而不絕其有功於世又大也爲中州集百餘卷又爲金源君臣言行錄往來四方采摭遺逸有所得輒以寸紙細字親爲紀錄雖甚醉不忘於是雜錄近世事至百餘萬言網束委積塞屋數楹名之曰野史亭書未就而卒嗚呼先生可謂忠矣

李治先生文集序興定正大中殆與楊趙齊驅壬辰北還老手渾成又脫去前日哇眇矣

徐世隆先生文集序金百年來得文派之正而主盟一時者大定明昌則承旨党公貞祐正大則禮部趙公北渡則遺山先生一人而已

四庫書提要遺山集四十卷附錄一卷金元好問撰好問字裕之秀容人登興定五年進士歷內鄉令天興中除左司都事轉行尚書省左司員外郎金亡不仕事蹟具金史文藝傳是集凡詩十四卷文二十六卷爲明儲懽家藏本宏治戊午沁州李翰爲刊板以行前有李治徐世隆二序末有王鶚杜仁傑二跋集末附錄一卷則儲懽所哀輯也好問才雄學贍金元之際屹然爲文章

大宗所撰中州集意在以詩存史去取尙不盡精至所自作則興象深邃風格適上無宋南渡末江湖諸人之習亦無江西流派生拗粗獷之失至古文繩尺嚴密衆體悉備而碑版誌銘諸作尤爲具有法度晚年嘗以史筆自任構野史亭採金源君臣遺言徃行哀輯紀錄至百餘萬言今壬辰雜編諸書雖已無傳而元人纂修金史多本其所著故於三史中獨稱完善亦可知其著述之有裨實用矣

顧嗣立元詩選小序百年以還名家輩出別裁僞體溯流窮源論者以先生爲標準不亦宜乎

廷堪案後三年庚申世祖即位始建元日中統迨至元八年辛未始改國號曰元

又案本集有張村杏花詩自注丁巳三月初二日又病中感寓贈徐威卿兼簡曹益甫高聖舉詩蓋先生絕筆也

又案倪魯玉補遼金元藝文志載先生所著書目史部雜史類有壬辰雜編子部小說家有續夷堅志集

部別集類有遺山集四十卷附錄一卷遺山詩集二卷詞曲類有中州樂府一卷遺山樂府二卷

穆案樂府五卷阮大傳於嘉慶中采進入內有提要載季經室集而其原本則文選樓書目亦不載也聞漢陽葉氏有寫本屢求未獲姑總集類有唐詩鼓吹十記於此待它日購得補刻云

卷注云元中書右丞郝天挺注中州集十卷文史類有杜詩學一卷東坡詩雅三卷錦機一卷詩文自警

一卷較本傳所載多續夷堅志遺山樂府中州樂府

唐詩鼓吹四種壬辰雜編續夷堅志不載卷數今新

刻續夷堅志二卷有至順二年石民瞻跋中州集十

卷與今所行本同陵川墓銘作百餘卷恐誤詩文自

警一卷與本傳作十卷者亦異詩集二十卷者即汲

古閣毛氏所刊本也今四庫著錄者惟遺山集四十

卷附錄一卷中州集十卷中州樂府一卷唐詩鼓吹

一卷元潘蒼厓金石例所取之文韓柳與先生為多

并云韓魏公祭式元遺山記其大略姑錄之此必在

先生所著書之內今不可攷矣壬辰雜編倪氏不載

卷數是亦未見興化任幼植禮部嘗為子言昔校歸

潛志以為壬辰雜編已佚後聞江南藏書家尚有之

偃師武虛谷進士亦云朱笥河學士有此書戊申冬

詢之朱少白同年云幼時見家有藏本虛谷所言不

妄亦不知其確否也附記於此以俟博雅者

穆案據四元玉

鑑莫若敘則先生亦明筭有細艸

又案徐威卿先生集序云東平嚴侯弟忠傑喜與士

人遊雅敬遺山永其完集以大其傳又李仁卿序云

東平嚴侯弟忠傑有文如淇澳好善如干旄獨能求

其全編將錄之梓且西走書數百里命予序引攷忠

傑為嚴實之子忠濟之弟見元史嚴實傳刻先生遺

集在中統三年距先生之歿方六稔蓋先生北渡後

設館授餐買山投老俾得肆力於編纂身後并為刊

布遺書雖趙天錫張德輝等分任之而嚴氏父子兄

弟實始終其事云

元遺山先生年譜卷之二

